


海城陳氏三代懿行錄

王士珍書



詩

類

詩類

古臨溟陳氏三代孝子節婦前後榮膺褒典丙寅中秋之月涓吉並入邑祠叨
在戚末謹集葩經詩句五章以美之

明明上天照臨下土至於海邦有秩斯祐凡百君子方將萬舞正是國人作爲式穀
赫赫業業敬明其德孝思不置維民之則俶載南畝貽厥孫謀烝我髦士百祿是迺
溫溫恭人維德之基順德之行象服是宜汎彼柏舟實維我儀子孫繩繩福履綏之
天保定爾以莫不興如山如阜如岡如陵錫茲多福三壽作朋神之聽之終和且平
矯矯虎臣祝祭于祊似續妣祖邦家之光吉蠲爲饔神保是饗報以介福萬壽無疆

朱寅臺

右第一章

張太夫人善體翁意虔事祖姑必誠必至守節卅年冰霜潔比余擬母傳謹爲詮次

右第二章

陳公德三八齡而孤事母盡孝以祖爲模有子嘸起馳聲東陲繆公銘墓揄揚匪誣

右第三章

賈太夫人慈孝揚庠事親承歡勤勉無尤課子苦學德進業修白君作傳足式女流

右第四章

一門節孝三代褒揚輝增綽楔饗入祠堂以妥以侑俎豆馨香禮明樂備穆穆皇皇

右第五章

陳氏三代旌揚節孝入祠懸額謹賦詩五章用當歌頌

袁金鎧

陳氏三代節孝榮典賦此紀盛

海邑有陳氏嘉暉燭鄉鄰清風旣允穆先德何貞純卓哉孝子心其年閱五旬持籌
出服賈晨夕依慈親亦有哲婦賢孀閨四十春冰霜厲高節畢世茹艱辛懿範炳前

軌德施逮後人綿延三代中芬郁揚芳塵崇誼邁恒類詞褒荷溫綸誰能切則儆澆俗應還淳

張作霖

驅車過臨溟西望騰鰲堡鬱鬱金氣萃林泉焜瑞兆桑麻側路緣停驂問耆老昔有陳孝子中朝勳旌表潛德綿耿光冢婦褒節孝光大三世榮雙額復殊詔天耆一家春錫類胥壽考亶亶此遺型門閭昌宜早耆老爲予言介卿庸中佼國勳登少將至今承肇造屹然苞幹才不逐狂瀾倒錫羨邀圓靈昌世方綿邈予聞是故人額手歡然笑遙爲進一觴援筆快揚藻

王永江

曾子養曾哲曾元養曾子三世皆養志萬古誰能比汎汎柏木舟沉沉古井水一生冰雪操百代馨香祀美哉臨溟城有嬌育於此孝行繼孔徒貞心比仇氏世德羨兒孫間言泯妯娌事親底豫順不僅潔滌滲相夫以敬莊不僅脫簪珥孝節是人瑞民

彝即天理喪事不過哀禮經限以軌苦節不可貞大易示以止似此寬假辭勸勉不入耳惟茲親與夫夢寐心目裏一朝失所依相差僅不死何謂性不滅何謂容不毀罔極無以報之死靡他矣守墓本尋常撫孤將有俟坯土崩宜防苦荼甘如旨一人肇雍和三代相續似白鳥集墓門冬青生婺里至德感人深庸行蒙福被太邱有佳兒從戎執鞭弭霜露思先德景行詔桑梓落落清德門邦人所瞻視天章煥寵光彤管頌芬美沒而祀於社褒揚應若是願將純懿行播入輶軒史表率此人倫聞風或興起謹獻入祠歌聊當薦藻芷

于冲漢

德莫大於節行莫大於孝子輿傳一經恪秉尼山教共姜誓柏舟詩人示則倣綱維天地間至性不在貌肫肫陳孝子百行具圓足家風日以純冰霜勵寡鵠擢秀挺孫枝賢孝交相勗坊表樹臨溟粹然敦薄俗一卷遍寰宇三葉咸表章巍巍樹人極奚止門閭光愧乏燕許才懿行弘闡揚繼述信無忝浩歌熱心香

鐵嶺 劉尙清

白山黑水間海城實奧域泥水帶其南盤岑拱其北富媼鬱鍾靈先民垂典則陳氏重竺行孝弟服農穡長條交遠蔭三世有餘澤請爲闡幽潛用代貞珉勒

吾聞漢董永傭畊以孝親有軼輝往牒豈獨光興門懿哉陳振聲異世有同源阿爹感不斟禱天代以身養顏忽見背呼晷摧心肝不惜一身死揮淚涕汎瀾上顧慈母恩惻惻中心酸餅疊屢告罄辛苦盤中餐擔簦事行賈風雲度津關命舛復喪駒何以供雞豚奄遘時不造鬻盡阮郎禪朱萼被幽薄勿使傷其根

張氏有靜女十七歸連茹听夕侍尊章浣濯到械踰翁出姑病革仰天痛號呼典我嫁時衣舉畚營墜周昊天胡不弔妾夫亦繼殂妾欲殉夫死泉下與之俱哀哀門祚薄誰爲事祖姑贏穀與幼雛誰爲撫此孤死既不可得撫牀更嗟吁勤劬十指血粒粒盤中蔬祖姑隨姑逝泫泫傾淚珠妾心旣已死妾志不可渝

范喬承祖訓相傳以硯石德三繩祖武相傳以孝德寒谷茅栗稀蓄旨常不給蒼蒼

非不仁後豐必先嗇投筆事服賈會計當其職龍蛇走郊原還珠復返璧阿母病膏
盲秦醫俱手棘虔心格神明豁然疹癘革參譚勤扶護中裙親浣滌田豁趙君租舟
予范氏麥孝思誠不賈爾類於焉錫達人興後裔析薪能樹立

吁嗟賈氏女弱齡藐諸孤轉徙依人廬相待如虜俘夢中神告語覺來蘇槁枯十七
歸太邱歐範與陶模結褵將數載兒女已成雛爲兒治髮髻爲女哺酪酥一鍼而一
鉢聊以供中廚良人事遠征黃羝祀竈鑪祖翁神侵頽况復姑抱瘵螻癪不可治湯
液親持扶姑兮誠孝婦娶婦還肖姑君看簷下霑滴滴曾不殊

世祿鮮由禮骨肉等寄拏不如田家子守義恆不踰節孝萃一門遑舉表寰區峨峨
閭山高湛湛遼水紆閭山石或泐遼水有時枯海城多崎行名教千秋扶不見三綽
楔至今昭路衢

花縣江天鐸

人有賢子孫三代榮金綬顯親爲光前孝親則裕後迺有陳孝子終身慕父母父歿

母年衰匿悲慰白首際遇多轍軻喪明更喪耦人不堪其憂孝子曰否否但得慈心
歡衾影斯無咎有子雖早亡事親賴賢婦嗟嗟節孝張懿德介歐柳殷勤事祖姑敬
謹事乃舅舅方出營商姑歿遭不偶拮据勉治喪喪儀稱薄厚節苦卅餘年有爲尤
有守教子惟義方不愧循循誘長子曰日新合資商營口折閱心不安虧累躬自受
重義自輕財言行從不苟性孝有祖風愛弟道惟友母病侍藥湯厠踰躬去垢德配
賈夫人賢聲播流久日先鷄鳴興勞勞操井臼篝燈事女紅三更綫在手鍼黹即生
機聊以助升斗愛子學將成託業精棄取名方列鬢宮皇綱正解紐游學渡東瀛母
不尼行走歸來擢將官興亞威名負次子飭業農本根託畎畝吁嗟孝與節三代三
不朽德厚福自多三代皆壽考千斯萬斯年人猶知某某孝節萃一門近世無出右
俎豆縣馨香褒揚稱僅有崇拜發真誠歌詩洒清酒

紹威將軍陸軍中將金紹曾

隆古道義尊聖賢垂言教百行有根源厥惟節與孝身修家以齊斯乃瞻功效傷哉

叔世風難與往古同嗜欲橫流日茫茫人海中逐物喜紛華世運堪咨嗟疇能風末世臨溟陳公家公家敦古道盛德彌蒼昊一門節孝兼後先膺榮表荔丹復蕉黃祠宇薦馨香浩氣扶倫紀惠澤流何長可以起頑懦豈惟邦家光

于國翰
王樹常

海城陳司令介卿之曾祖振聲公以純孝著卿里耆宿聞於朝特予旌表其祖母張太夫人守節四十餘年尤以節孝見稱及其尊翁德三公
慈賢太夫人亦皆以賢孝聞於

遐邇并受政府褒揚猗歟盛哉何陳氏祖德之厚使孝子節婦咸萃於一門哉是知介卿司令今日之公忠風義施聲聞於當世此亦由三代至性庸行有以致之也中本不文忝與介卿司令硯席相親關於家教之本源聞知有素故敢不揣鄙陋妄擬燕詞勉強成篇雖不足闡揚美德於萬一然聊誌欽崇藉告當世可耳

遼海有山城風高月皎潔松嶺接蘭陔清芬長鬱結陳氏鍾神秀家風敦孝節三代旌門閭四德無虧缺猷畝出完人純孝勝袍笏每患乏甘旨學商悲遠別作客去未

久適驚庭玉折隱淚笑登堂弄孫博親悅母病日忘餐母歿慟幾絕三載血淚痕
窈成丹穴婦善繼翁志孝謹且貞烈奉親恃女紅撫幼茹冰雪貽謀勗孫子輩出多
英傑家教有淵源勵行益奮發後起應運生昌大光門閱十載歷戎行治軍專節鉞
德化舊名門芬芳流不竭傳紀載宋唐古今同一轍庸行本天成遺型啓末葉嶄嶄
列崇祠春秋時展謁

陸軍中將華世中

彝倫炳丹霄序別定名分天下正喪亂此理忽焉紊世道日凌夷罔知逆與順皜皜
指明星觀茲實爲僅海枯復石爛至行出天性嘉禾吐秀華芬蘭含清韻節孝萃一
門衰薄況晚近愧無中壘筆爲續千秋鏡

明曹鼎著千秋鏡十卷皆古今嘉言懿行

陸軍中將唐寶潮

自古道統傳唐虞稽二帝執中闡精一庸行祇孝弟幹蠱稱大禹成天復平地武周
稱達孝繼志更述事衍緒及孔門閔曾敦古誼孝哉無間言子騫共稱字手足懷冰

淵戰兢而惕厲厥後士習衰德行遜文藝滄海歎橫流世風到叔季論語摧爲薪孝經弁髦棄非孝更無親邪說恣橫議人倫變豺虎斯世何由治吾鄉有

高賢至行敦三世華胄溯遙遙仍爲虞舜裔卓哉

振聲公篤孝成孤詣失怙痛悼深復爲慈親計將母出真誠喜愠隨其意委曲備旨甘典質罄衣笥旋遭失恃悲團焦營苦次旦夕哭失聲清溫情無二葬期及三年幾絕流痛淚懿歟

太夫人源出清河系三十喪所天苦節冰霜勵之死矢靡他不亞共姜衛曲意事翁姑動必遵禮義送死質釵裙謀生勤編織遠識在課孫培植成偉器奉不求口體相勗惟養志矯矯

德三公資稟生有異乃自幼而孤失怙方八歲恂恂里黨間家聲恐失墜繩武以象賢承先爲錫類立志比金堅守身同玉粹明道不計功正誼不謀利篤信董生言俯仰真無愧所志在養親夙夜不遑寐常則膳羞潔疾則湯藥侍豈徒勤抑搔兼爲治

踰廁視聽先形聲孝思真不匱攸行率乃祖幾難分軒輊後先荷旌褒兩朝榮寵賜
見者感歎之嗚咽爲流涕真足格冥頑豈僅光里第薰德而善良氣皆銷悖戾始信
通神明四海胥光被以此至德光餘澤裕後嗣繼起

司令公其生原有自詩禮夙所聞泮林曾拔萃謀生爲家貧中途遭顛躓奮志赴東
瀛韜鈴嫻機祕歸來賦從軍顯揚初志遂擊水擬鯤鵬追風同麒麟共羨梁棟材迴
異風塵吏慨然念先德鐘鼎勒銘誌奉主入邑祠謹將吉日簋綽楔耀門楣席設筵
復肆遠近禮同瞻節孝祭兼致不惟閭里榮併欲風俗易從此萬斯年子孫引勿替
昔人曾有言孝弟爲人瑞於今益信之願人同仰企小子亦少孤孀慈託蔭庇叨竊
甲第榮已同白駒逝今更嗟衰朽念之空涕泗視此遠不逮日月燭火例百拜陳此
詞已甚慙其細附之大雅末聊爲採風備

前翰林院侍講學士蒙古世榮

達孝敦庸行竭敬志不辱亮節重婦德貞順涅如玉孝節兩不易况乃一門篤古昔

良已難矧復值末俗昭哉海城陳厚德誰可續素里發靈暉挺曜在阡陌孝子居有行令聞實昭赫闡闡方未興懋遷遭艱迫曾是身寒衰奉親無違逆眷戀庭闈間色思俱柔懌養隆知馨潔亶亶敬晨夕恒度持不訾至性神明格以此不匱思而永錫類獲哲子與賢孫孝友世惟宅一門從所感垂型且未已孝友既足多亮節乃可喜節母張與賈礪操遍鄉里簪蒿躬耨饁負載欣耒耜蒸嘗奉無違敬行佐君子或傷黃鵠別或感分飛似經營內外間禮訓良不訾課兒傳經幔教子成良仕肅肅二姑婦虔恭貽嬪史昔在瑯琊王凌波捕魴鯉更聞歐陽母晝荻追先揆至行足感人節孝難并美三代傳令聞茲世實無比好是以靖恭榮顯安所止福佑啓後人麟振亢宗起乃以上諸朝榮褒揚國紀鄉鄰稱盛德千秋崇邑祀歲在丙寅秋恭逢隆典始昭事禮觀盟告奠樂歌徵明德俎豆馨懷仁廣讌侈纓笏帟序陞百流敬仰只邈猗誠莫參無二斯至理來者豈大難後昆式在此

庭柏有奇節陔蘭滋靈根孕育家之瑞清芬芷雲孫海城推陳氏世爲通德門卓犖
冠時彥韜鈴蒞戎軒憶昔在里閭備聞文獻存示我先德傳足資風教敦反復展誦
已肅然表敬尊君之曾王父孝行衆所企力穡馨膳羞肇牽謀菽水阨窮不見憂承
歡轉復喜用以慰親心相依恆尺咫履境忘苑枯典衣求甘旨衰齡痛母喪廬墓團
焦次嗚呼志乘光人倫式桑梓淑德賡佑啓乃得冢婦賢貞操礪霜雪堅苦篤性天
母有婦克孝徽音嗣所先姑婦詠錫類舊澤白華篇純行繼三世綽楔輝煌聯粉榆
誇盛事胙饗崇豆籩豈徒耀鄉里彤管美史編嗟今世俗遷倫紀憂頽放緬茲賢孝
風庶幾共興仰喬木蔚菁莪筠竹植篠簜德徽延後昆功業日開朗永言念典型持
此勵吾黨

瀋陽鍾毓

世衰道益敝倫紀蕩如埽羣儔倡新說矢口肆雄鷺劬勞罔知報對父且申討女德
亦凌夷夫逝多再醮啄母臬愈悍求牡雉爭叫譬如飲狂泉安望沉疴療誰能身作

則撲此毒燄燎有懿陳氏宗先德著光劭事親得其懽養志竭誠孝孀閨賦黃鵠
冰雪厲貞操伯奇與桓稌三代相暉照褒旌賁累葉奎墨燦文藻煌煌四綽楔閭里
振英耀詎惟家乘榮實亦毗世教邑祠隆享祀千古薦劬耄摘詞揆盛烈釘鉸任同
誚

李維楨

節孝立人極仁賢莫能外惟其基之深所以後必大煌煌金石鐫肅肅冰霜會舉世
所盛稱千秋難掩蓋卓哉

陳氏門高風無乃太得一已云難褒揚至三代庸行世所希礪節除塵瑳綽楔光焜
煌豐碑詞滂沛吾儕再稱述可以等自鄙慨念末俗醜民風日凋瘵名節旣已輕禮
防復頽壞孝節荷寵褒俎豆付祝禴後嗣隆隆升方將未有艾聞風必欽遲觀感得
芑賴儀行心已折相對能無拜將詩攄寸誠自愧須彌芥

開原 楊大實

從來孝與節可以總百行爲其心所安發於人至情治身實莫先奕世傳修名四體
有心腹枝葉得根萌煌煌陳氏門三代誰與并洞洞如執玉屬屬若奉盈厥先振聲
公炯介還修明始殫愛敬方終極哀思誠嬪喪匿其感慰母惟力耕解衣付質庫甘
旨供湯羹餘事治靈蓍幽贊通渺冥親歿廬於阡殷田爲失聲德公承祖德孝行尤
可稱化居事所親折閱心常寧威踰手自潔承歡寤寐縈果然嗣君賢聲威懾百城
豐功自赫然申憲以治兵兩世太夫人苦節甘臨徵冰霜四十年一行尤足驚此皆
世所難補剋息天鯨俎豆本應爾合樂聞簫笙神霄玉清間自有雲璈迎

開源 郭夢齡

自古重倫常乃所謂庸德人生處家庭誰其行之力能以純孝聞復爲冰節勵孝節
并揚麻三代四人具際茲崇祀典邑祠且增色迺復慶褒榮臨額輝堂北善行爭傳
頌無論識不識我輩幸聞風且難默爾息行述况遙頒徵文遠千里不能已於言聊
將貢一則且無事鋪張且無加粉飾但有善必揚一一徵諸實